

FILIPOMO ITE CRISTONA HNOTINOMO PABLO ORETAGA RABE

Uaiduacino

1 ¹⁻²Filipomo ite creyentiai, Jesucristomo jai omoi duillamona, bie carta omoi dine oredicue. Pablodícue. Timoteo cue diga ite. Naimie cominina coco illamona, Jesucristo díbeimo maijicabidicoco. Omoímo coco uaina oredicoco. Omoi creyentiai illaicomínimo coco uaina ua oredicoco. ¿Nígacino? ¿Nie isoidomoi? Cai Moo Jusiñamui, cai Nama Jesucristo diga, omoina jai duenaite. Iena uñocana mai omoi jai. Iaimaiai omoina uri jai itatate. Iena omoi uñocana mai omoi jai.

Jusiñamuimo iobillacino fecade

³Naga icaiño omoina cue comeciia, Cristo rafuedo omoi jailla jira, Jusiñamuimo iobillacinona fecadícue. ⁴Naga icaiño Jusiñamui diga cue ñaia, omoi facaina caimare jíidícue, ⁵Jesucristo rafuena cue llwana cuena omoi canua jira. Nano bie rafuena omoi cacajamona, cuena canodomoi. Cuena nia canodomoi. ⁶Jusiñamuidi omoi comeciaina jaie marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiriuimo Jusiñamui bie rafuena fuidoite. Iese fuidollemo ocuiridícue. ⁷Omoímo iese cue comecina cue facajia, omoina cue

isiruilla jira, cuemona mare. Cárcelmo cue illamona, Jesucristo rafuena cue riiduano, Jesucristo rafuedi uanaicino cue llwano, Jusiñamui cuena canocabide. Iemona naimie caina duenaillana jai uñotícai. ⁸Cuena omoina Cristo Jesús isiruitajamona, nana omoina isiruitícue. Jusiñamuidi uanaicinona cue llwana uñote. ⁹Jiaie cominina eo isi-isiruicana omoi jaillena, Jusiñamuina raise omoi uñollena, nie isoide rafue omoímo ia, abina raise omoi uñollena, Jusiñamuimo jíicabidícue. ¹⁰Iese omoina jitaídícue. Mare rafuedo omoi jaicanana jitaídícue. Jiaíruido Cristo abido biite. Ie jira omoi comeciiai jeanillena jitaídícue, Jusiñamui jitailla isoi omoi comeciiai marena illena. ¹¹Jusiñamui jitailla isoi omoi illamona, mare rafuena jaca omoi finuana jitaídícue. Jesucristona omoi inuamona, naimie omoina iena finotarede. Iese omoi finocana omoi jaia, Jusiñamuina eo iobitaitomoi.

Cárcelmo Pablo illamona, diga comini Jesucristo rafuena cacadimaci

¹²Cue amatiai, bie rafuena omoi uñuana jitaídícue. Cárcelmo cue illamona, diga comini Jesucristo rafuena cacadimaci. ¹³Cai illaima jofomo itino cacadimaci. Nana bene

itino jiai cacadimaci. Jesucristo rafuena cue llua jira, cárcelmo iticue. Iena jai uñnotimaci. ¹⁴Cárcelmo iticue; ia jaciruiñeno Cristo rafuena nia lloticue. Iemona diga creyentiai naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

¹⁵Cuena uradoillamona, cue afemo iacanamona, damierie Cristo rafuena llofuetimaci. Jiaie llofueraini marecinona finuacanamona llofuetimaci. ¹⁶Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uñnotimaci. ¹⁷Cue afemo iacadino mare comeciainomona llofueñedimaci. Iemona cuena duere finoacadimaci. ¹⁸Tese itimaci; iadedi uradoillamona naimaci llofuia, marecinona finuacanamona naimaci llofuia, cuemona damamei iesede. Cristo rafuena llocana jaidimaci. Iena jai iobidicue. Nia iobiticue. ¹⁹Cueri Jusiñamui omoi jiano, Jesucristo Joreño cuena canuano, nana cuemo ite rafuemona jilloiticue. Iena cue uñnuamona, nia iobiticue. Jesucristo Joreño ie Moo diga daje. ²⁰Cue finolle rafuemona cue meiruiñellena eo jitaidicue. Jiaie cue finocabilla isoi, Cristona marefodo birui iobitaiacadicue. Cue nia fiodaiñenia, naimiena iobitaiacadicue. Cue fiodaillemona naimiena jiai iobitaiacadicue. Iemona jiaie creyentiaidi Jusiñamui iobillacinona fecaitimaci. ²¹Nia cue fiodaiñenia, Cristo rafuena nia lloticue. Mare; iadedi cue fiodaia, naimie dine cue illena jiai eo mare. ²²Nia cue fiodaiñenia, diga cominimo Cristo rafuena nia lloticue. Ie jira nie isoide cue illana cue comeci niese rainide. ²³Nia raise uññoñedicue. Jiaicaño fiodaiacadicue. Jiaicaño fiodaiacadicue. Cue comeci Cristo dine

jaiacade. Nainomo cue illena cuemona eo mare; ²⁴iadedi omoina cue canollena, nia fiodaiacaiñedicue. Cue nia fiodaiñenia, omoina nia canoacadicue. ²⁵Cue comecina jai facajano, raite: “Nia fiodaiñeiticue. Omoi diga nia cue illana uñnoticue”. Cristona omoi iñnotacana omoi jaillana jitaidicue. Omoi iñnuamona, caimare omoi illana jiai jitaidicue. ²⁶Iemei omoi dine dane cue illa jira, cueri Cristomo iobillacinona eo fecaitomoi.

²⁷Cue fiodaia, cue fiodaiñenia, Cristo ie mare rafuedo omoi jai. Omoina cue cioia, omoina cue cioñenia, mare rafuena omoi finuana fidiacadicue. Cristo rafuena iñnocana omoi jaillana, omoi comeciai daje isoi lloillana, Cristo rafuena omoi riiduana fidiacadicue. ²⁸Omoi dibeimo iñedinona omoi jaciruiñenana fidiacadicue. Iese omoi ia, Jusiñamuidi omoi dibeimo iñedino faifillana uññotaite; iadedi naimiedi omoina omoi jilluana uññotaite. Naimie diga omoi jaca illena, omoina jai jillotate. ²⁹Jusiñamui Cristona omoi iñnollena omoina fetode; iadedi Cristori omoi duere sefuillena omoina jiai fetode. ³⁰Omoi nairaimo cue nano illa facaise Cristona iññoñedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jiai duere sefuidomoi.

Jiaie creyentiai diga raise omoi illacino

2 ¹Jiaie creyentiai diga omoi marena illena, dajerie rafuena lloiacadicue. Cristomo omoi duilla jira, coninina omoi comeciai ocuiñotajamona, Cristo omoina isiruillana omoi uñnuamona, Jusiñamui Joreño nana omoina nabaitajamona, coninina omoi comeciai

eo duenailacino illamona, ²cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata. ³Jaca buena finoñoeno, jiaimie afemo jamai omoi illena. Abina ieduamona buena finoñoeno. Abina iedoñoeno jiaimacimo comeciaina faca: “Naimaci cue baifemo faite”. ⁴Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca. ⁵Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. ⁶Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede; ⁷iadedi iena fañonocaida, ie Moo ocuica rafuena finollena, iimana naimie jaide. ⁸Jamai bue isoidimiena jaide; iadedi ie Moo uaina iinote. Ie Moo jitailla jira, fiodaite. Maraiñede rafue finodimie isoi, cruzmo fiodaite. ⁹Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitade. ¹⁰Jesúna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisai naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiai fecaitimaci. ¹¹Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

**Maraiñedino comeciaina
lligaiñotomoi**

¹²Cue isiruiga amatiaidomoi. Ie Moona Jesucristo iinua jira, cue lluaena

nia iinocana omoi jai. Jai e omoi diga cue ia, Cristo rafuena raise iinotomoi. Birui omoi diga iñedicue; iadedi Jusiñamuina omoi iinua jira, naimie jitailla rafuena jaciruoicaida, finocana omoi jai. ¹³Ie jitailla rafuena omoi finollena, Jusiñamui omoi comeciaina birui marena itatate. Naimie omoína iena finotaiacade. Naimie mare jitaillacinomona, omoína iena finotaite. ¹⁴Nana omoi finolle rafuemo abi jafueoicañeno fino. Uai uaitañeno fino, ¹⁵jiaie comini omoiri ñai raillanona, Jusiñamui uruiaina omoi illa jira, omoi comeciai jeanidemonona marena omoi i. Maraiñede comini motomo itomoi. Naimaci comeciai jearede. Naimaci comeciaina lligaiñotomoi, naimacimo ite jeacinona uiñotallena. ¹⁶Jesucristo rafuena llocana uitomoi. Iena naimaci iinuaamona, bie rafue Jusiñamui dine cominina jaca itatate. Cristo dane billirui omoiri cue iobiacana jira, omoi dine: “Tainona jai e lloticue” cue raillano, Jesucristo rafuena llocana nia omoi jai. ¹⁷Jusiñamuina omoi iinua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiai jitaia, iobiticue. Omoi diga jiai caimataitocue. ¹⁸Ie muidona caimare iitomoi. Cue diga caimataitomoi.

Pablo Timoteona orede

¹⁹Cai Nama Jesús jitaia, omoi dine Timoteona raire oretaiacadicue. Cue dine abido naimie bia, omoi rafuena cue fidiano jiai iobiticue. ²⁰Cue dine jiaino naimie isoi iñede. Dama naimie omoi ite rafuemo comecina facade. ²¹Jiaino dani naimacimo ite rafuemo comeciaina facadimaci. Jesucristo rafuemo comeciaina facañedimaci. ²²Timoteodi mareuidimiena uiñotomoi. Cue jito isoide diga, Cristo rafuena lloticoco.

²³Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadieue. ²⁴Cárcelmona cue jino jaillena cai Nama jitaia, omoi dine jiaí raire jaiacadieue.

Pablo Epafroditona abido orede

²⁵Epafroditodí cue ama isoide. Danomo Cristo rafuena lloticoco. Danomo Cristo rafuena riidotico. Naimiena oredomoi, cuena canollena. Naimiena omoi dine abido oretaiacadieue, ²⁶omoi dine naimie illemo naimie comecina facaja jira. Naimie navui duillana omoi fidia jira, naimie uri iñede. ²⁷Navui niadedi fiodaiacanamoná jillode, Jusiñamui naimiena duenailla jira. Naimie fiodaillamoná, eo cue duere sefuiñellena, Jusiñamui cuena jiaí duenaite. ²⁸Ie jira Epafroditona eo raire oretaiacadieue, naimiena omoi cuanoná omoi iobillena. Iemei jiaí uri iiticue. ²⁹Cai Nama mamecido naimiena eo caimare feiño. Jiaie naimie isoidinona omoi dine ia, naimacina iobita. ³⁰Cristo facaina navui naimie llofuiamoná, omoi facaina cuena canollena, niadedi fiodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

Moisés micori llogacinuaido jaidinomona abina rairui

3 ¹Cue amatai, omoimo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamoná, omoina canoite. ²Jearede rafue finode cominimona abina rairui. Jiconiaí isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaína detatatimaci; iadedi naimaci comeciai nia raise

finoñedimaci. ³Cai abiaína detatajamona, cai comeciai raise finobiñede. Cai comeciai raise finuamoná, Jusiñamui Joreñodi caina Jusiñamuina raise sedatate. Cristo Jesúri iobidicai. Cai jillobillena, cai abiaína detatañedicai. ⁴Buena cai finuamoná cai illamoná jillobidicaidena, cue jilluna raise uiñoticue. Cue cominimona jamai bue isoñedicue. ⁵Iena ja ñaiticue. Cue jeiciamoná ocho digarui illamoná, cue abina degacue. Cue eirue jitodí Israel micori. Benjamín isie imiedicue. Cue cominidí judíuái imacina jira, cue uruenamoná judíuái uaido ñaiticue. Fariseo cue imiēna jira, Moisés micori llogacinuaido fainonocaiñeno iedo eo jaidicue. ⁶Iena eo cue jitailla jira, Cristona iinotinona duere finodicue. Nana Moisés micori llogacinuaido eo raise jaidicue. Iena raise finodicue. ⁷Iese jaie iticue. Cue comeci iena: “Mare” raite; iadedi Cristona jai cue iinua jira, birui nana bie rafuedi cuemona ieñedicinuai. Naie isoide rafue cuemo illamoná, cue jeacinomona jilloñedicue. ⁸Dane lloticue: Cue Nama Cristo Jesúna cue uiñoiacana jira, jiaie rafue cuemona ieñedicino. Naimiena cue uiñuacinodí nana jiaie rafue baifemo faite. Jeacuai isoi jai marañena jira, naimie muidona cue jaie illacinona jai sofecaicue. Iena sofeticue, Cristo díbeimo raise cue illena, ⁹naimiemo raise cue duillena. Moisés micori llogacinuaido cue jillamoná marebicañedicue; iadedi Cristona cue iinuañamoná marebicaidicue. Cristona cue iinua muidona, Jusiñamui cuena jai marebicaitate. ¹⁰Cristona raise uiñoiacadicue. Naimie fiodaite; ia iemona jillode. Naiemona cue comeci marena illena, naimiena jillotate uaina uiñoiacadicue. Naimie rafuena cue llumoná, naimie isoi duere sefuiticue.

Iemona nibai fioidaiticue. ¹¹Cue fioidaille mei, fioidaillamona naimie isoi cue jilloillemo ocuridicue. Ie jira naimiena uñocana jaiacadicue.

Pablo jitaillacino

¹²Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaiie uaidote. ¹³Cue amatai, iena nia iñedicue; iadedi jaiie cue finoca rafuemo comecina facañedicue; iadedi cuemo nia suiñede rafuemo birui eo ocuridicue. ¹⁴Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena. ¹⁵Caimona Cristo rafuena raise abina uñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uñotaite; ¹⁶iadedi caimo jai ite uñuacinodo mai cai jailli.

Pablo illa isoi cai illa

¹⁷Cue amatai, Cristona cue iñua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena. ¹⁸Jaiie omoimo llouidicue. Cue sunaillamona dane lloiticue. Ailluena comini Cristo fioidailla rafuena birui jitañedimaci. ¹⁹Ja muidomo faifitimaci. Naimaci Jusiñamuidi imaci guille, dani guille ramo naimaci comeciai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena. ²⁰Monamo ite Jusiñamuimo cai jainaiailla jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima. ²¹Naimie bia, cai fioidaille abina meidoite, naimie ebirede abi isoi cai illena. Nana ra

naimie anamo itatate uaido caina iese meidoite.

4 ¹Ie jira Cristo rafuena iñocana nia omoi jai. Cue amatai, omoina isiruiticue. Omoina cioacadicue. Omoiri iobidicue. Cue llumona Cristona jaiie iñotomoi. Ie rafuedo omoi jailla jira, iobidicue. ²Evodia raillañaiñomo rafuena lloiacadicue. Síntique raillañaiñomo jiai lloiacadicue. Cai Namamo iañuui duilla jira, iañuui comeci daje isoi lloillana jitaidicue. Coniño diga icirillana jitañedicue. ³Cue mare nabai, omo jicanoticue, iañuaina canollena, coniño diga iañuui dane marena ñaillena. Cristo rafuena cue diga llotiañuui. Clemente diga llotiañuui. Cue diga llofueuidino diga llotiañuui. Monamo ite rabenicomo nana naimaci mameciai jai cuela. Jusiñamui diga monamo jaca iite comini mameciai diese cuela.

Iobillacino, uri illacino diga

⁴Cai Namamo omoi duilla jira, jaca iobi. Dane lloiticue: Iobi. ⁵Omoi riininana nana comini uñuana jitaidicue. Cai Nama dane abido billirui iaie ite. ⁶Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaia, naimiemo iobillacinona jiai feca. ⁷Iemei Jusiñamui omoi comeciaina uri itataite. Omoi comeciiai facajacino baifemo omoina uri itataite. Cristo Jesúsna omoi iñuano, omoi comeciaina eenoite. ⁸Cue amatai, ie muidomo daje rafuena nia lloiticue. Uanaicinomo comeciaina faca. Iñogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca.

Nana bie isoide rafuemo comeciaina
faca. ⁹Nana cuemona omoi fueoga
rafuedo omoi jai. Nana cuemona omoi
feñoga rafuedo omoi jai. Nana
cuemona omoi cacaja rafuedo omoi jai.
Nana cue finoca rafuena omoi ciua
rafuedo omoi jai. Iemei omoi
comeciaina uri itatajanona, Jusiñamui
omoi diga iite.

**Filipomo ite comini
Pablona eo canodimaci**

¹⁰Cai Namari iobidicue, diga irui
illamona dane cuena omoi comecia jira.
¹¹Cuomo comeciaina facadomoi; iadedi
bu jaca binide, ucubena cue dine
atillena. Bumo cue jitaillacinona
lloñedicue. Janore ra cuemo ia, ailluena
ra cuemo ia, caimare jai iticue. Cuemo
ite ra diga caimare illana jai uiñoticue.
¹²Duere cue illana jiai uiñoticue. Níe isoi cue ia,
uri cue illana jai uiñoticue. Cue monia,
cue aimetaia, janore ra cuemo ia,
ailluena ra cuemo ia, jaca uri iticue.
¹³Níe isoide rafue cuemo ia, Cristo cue
comecina ocuiñotaja jira, naga rafuena
finocana jaiticue. ¹⁴Cue duere
sefuillamo cuena omoi duenaillamona,
cuena omoi canua jira, cuemona mare.
¹⁵Omoimo Cristo rafuena nano cue
lluamona, cuena canodomoi.

Macedoniamona cue jailla mei, jiaie
creyentiai cuena canoñedimaci. Dani
omoi cuena canodomoi. Iena uiñotomoi.
¹⁶Tesalónicamo nia cue ia, diga icaiño
ucube cuemo oredomoi; ¹⁷iadedi omoi
ucubena nicidoñedicue; iadedi cuena
omoi canuamona, Jusiñamuimona ibana
omoi feñuana jitaidicue. ¹⁸Nana cue
jitaille rana jai feñoticue. Ailluena
cuemo ite. Epafroditomona cuemo omoi
oretaga rana feñoticue. Jusiñamuimo
fecadomoi isoide. Jusiñamui dibeimo
cue maijia jira, mare rana finodomoi. Ie
jira Jusiñamui iena gaide, caimare
soride rana cai gaia isoi. Naimie iena
jiai feñote. ¹⁹Naimiemo ailluena ite
ramona cue Jusiñamui nana omoi
jitaille rana fecaite, Cristo Jesúmo cai
duilla jira. ²⁰Cai Moo Jusiñamuimo
iobillacino jaca cai fecacabillasa. Iena
jitaidicue.

Fuiduacino

²¹Cristo Jesús mamecido cue facaina
nana creyentiaimo cue uaina lloño. Cue
diga amatiai imaci uaina jiai oredimaci.
²²Nana benomo ite creyentiai imaci
uaina oredimaci. Cai illaima César
jofomo maijidino imaci uaina ua
oredimaci. ²³Cai Nama Jesucristo omoi
comeciaina jaca caimare itatajana
jitaidicue. Mai. Pablocue.